

**TEKS PERUTUSAN KHAS**  
**HARI JADI RASMI**  
**TUAN YANG TERUTAMA**  
**YANG DI-PERTUA NEGERI SABAH**  
**PADA 07 OKTOBER 2023**

---

Bismillahir Rahmanir Rahim

Alhamdulillahi Rabbil Alamin Wabihi Nasta'in

Assalamualaikum Warahmatullahi Wabarakatuh dan

Salam Sejahtera.

**PENDAHULUAN**

1. Alhamdulillah, setinggi-tinggi kesyukuran dipanjatkan ke hadrat Allah Subhanahu wata'ala kerana dengan izin dan limpah kurnia-Nya jua, maka kita dapat bersama-sama lagi dalam Majlis Sambutan Hari Jadi Rasmi saya yang ke-70. Saya ingin merakamkan penghargaan dan ucapan terima kasih kepada tuan-tuan dan puan-puan serta semua yang terlibat dalam menjayakan majlis sambutan pada pagi ini.

2. Saya bersyukur ke hadrat Allah Subhanahu Wata'ala kerana dengan izin-Nya kesihatan saya sentiasa terpelihara serta dipanjangkan usia sehingga kita semua dapat berhimpun dan bersama-sama merasai suasana penuh istiadat di upacara yang sangat bermakna pada hari ini. Sesungguhnya, majlis ini merupakan satu penghormatan kepada saya, sekali gus menunjukkan kesetiaan tidak berbelah bahagi terhadap negeri Sabah dan negara kita Malaysia.

Para Hadirin Sekalian,

3. Kita berasa amat bertuah apabila baru-baru ini, Ke bawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Al Marhum Sultan Ahmad Shah dan Raja Permaisuri Agong, Tunku Azizah Aminah Maimunah Iskandariah bersama rombongan berkenan mengadakan misi jelajah 'Kembara Kenali Borneo' dari Sabah ke Sarawak pada 3 hingga 13

September 2023 yang lalu. Ia merupakan pengembaraan yang julung kali diadakan bagi mengenali lebih dekat rakyat Malaysia yang menetap di pedalaman Sabah dan Sarawak dan sekali gus mendekati penduduk kedua-dua negeri. Semangat dan sambutan hangat oleh rakyat dengan menunjukkan sikap toleransi dan kerjasama yang baik telah dapat menyempurnakan impian Baginda berdua mendekati rakyat negeri Sabah dan Sarawak menerusi program tersebut.

4. Seri Paduka Baginda berdua telah menzahirkan rasa sukacita dan syukur serta setinggi-tinggi ucapan terima kasih kepada seluruh rakyat negeri Sabah dan Sarawak atas sambutan sangat hebat yang telah diberikan kepada Baginda berdua dan sekeluarga sepanjang pengembaraan menelusuri Lebuh Raya Pan Borneo.

5. Kita juga telah menyambut Hari Kebangsaan pada 31 Ogos 2023 dan seterusnya Hari Malaysia pada 16 September

2023 yang lalu. Dua peristiwa bersejarah ini telah menyemarakkan lagi semangat patriotisme dalam sanubari rakyat semua kaum. Negeri Sabah sendiri adalah contoh nyata perpaduan dalam kepelbagaian apabila Hari Kebangsaan dan Hari Malaysia diraikan penuh gilang-gemilang dengan menyaksikan pelbagai kaum dan peringkat usia menzahirkan semangat dan rasa cinta akan tanah air.

Para Hadirin Sekalian,

6. Sempena Sambutan Hari Jadi Rasmi saya yang ke-70, adalah menjadi hasrat saya agar negeri ini terus mengekalkan keamanan dan keharmonian, rakyat dapat hidup selesa dan bertambah makmur serta berusaha lebih gigih dalam membangunkan negeri ini.

## **MENGEKALKAN KEHARMONIAN**

7. Sikap saling hormat-menghormati dan bersatu-padu dalam kalangan rakyat yang berbilang kaum dan agama adalah merupakan salah satu faktor yang dapat menyatukan negara. Semua lapisan masyarakat perlu bertolak ansur dan meraikan kepelbagaian dan perbezaan sebagai suatu kelebihan serta sentiasa berwaspada terhadap sensitiviti agama dan budaya pelbagai kaum. Saya berharap agar kita semua bersama-sama menjaga nilai-nilai ini untuk mempertahankan negeri ini agar terus harmoni dan kukuh.

## **MEMPELAJARI TEKNOLOGI BAHARU**

8. Sesuai kepada perkembangan teknologi semasa, suka saya melihat agar rakyat terutamanya golongan belia agar sentiasa bersedia untuk meneroka dan mampu beradaptasi dengan mempelajari kemahiran baharu, terbuka minda kepada

perubahan serta celik digital agar kekal relevan dalam perkembangan pantas dunia digital hari ini. Sekurang-kurangnya salah seorang isi rumah dalam sesebuah keluarga perlu mengambil peluang menjana pendapatan melalui kemajuan teknologi digital agar dapat membangun ekonomi keluarga ke arah masa hadapan yang lebih baik.

Para Hadirin Sekalian,

### **KEPENTINGAN INTEGRITI DALAM PERKHIDMATAN**

9. Dalam masa yang sama, saya percaya melestarikan budaya integriti dalam kepimpinan pentadbiran dan perkhidmatan adalah sangat penting. Budaya integriti yang diamalkan secara berterusan mampu menjamin negeri ini diurus tadbir dengan penuh tanggungjawab dan baik. Ini kerana amanah dan tanggungjawab yang berpaksikan kepada integriti dapat meningkatkan keyakinan rakyat, komuniti perniagaan,

pelabur-pelabur tempatan dan luar negeri terutama terhadap kepimpinan pentadbiran kerajaan untuk memastikan rakyat menikmati pembangunan yang dijanjikan.

Para Hadirin Sekalian,

### **USAHA BERTERUSAN MEMBANGUN NEGERI**

10. Saya ingin mengucapkan tahniah kepada Kerajaan Negeri di bawah kepimpinan Yang Amat Berhormat Datuk Seri Panglima Haji Hajiji bin Haji Noor, Ketua Menteri Sabah dan seluruh anggota Kabinetnya, yang secara terus menerus berjaya melaksanakan program-program pembangunan bagi memberi lebih banyak manfaat kepada rakyat. Pelbagai inisiatif yang menjadi kesinambungan usaha kerajaan untuk terus memperkasa dan meningkatkan taraf kehidupan dan ekonomi rakyat telah dilaksanakan agar tidak ada yang terpinggir dan

seterusnya dapat keluar daripada kepompong kemiskinan. Pertumbuhan ekonomi yang positif dan nilai perdagangan yang meningkat dapat dilihat apabila negeri Sabah berjaya menarik lebih banyak pelabur dan memperolehi hasil yang tinggi. Demikian jugalah dengan sektor pelancongan, perdagangan, perindustrian dan sebagainya yang sudah menunjukkan peningkatan yang positif. Kejayaan penganjuran *Sabah International Expo 2023* baru-baru ini juga menunjukkan para peniaga dan pelabur tempatan dan luar negeri semakin menaruh keyakinan tinggi terhadap pertumbuhan ekonomi negeri ini.

11. Sesungguhnya, negeri Sabah maju kerana adanya usaha berterusan semua pihak yang terus komited untuk menyokong, melaksana dan menjayakan usaha pembangunan negeri ini. Saya yakin Kerajaan Negeri akan memanfaatkan sepenuhnya persefahaman dan hubungan baik dengan Kerajaan

Persekutuan dalam usaha untuk terus membangun dan memajukan negeri ini.

## **PENUTUP**

12. Akhir kata, pada hari yang penuh istiadat ini, saya sekali lagi merakamkan penghargaan dan terima kasih kepada semua peringkat kepimpinan, baik di peringkat Negeri mahupun di peringkat Persekutuan serta seluruh rakyat atas ucapan tahniah dan doa sempena Hari Jadi Rasmi saya yang ke-70 pada hari ini.

13. Saya juga merakamkan penghargaan dan terima kasih kepada seluruh anggota perkhidmatan awam, pasukan-pasukan keselamatan, agensi-agensi penguatkuasa, sektor swasta dan semua pihak atas dedikasi dan sumbangan kepada kesejahteraan dan keamanan negeri ini. Semoga kita sentiasa

berada di dalam rahmat dan lindungan Allah subhanahu  
wata'ala jua.

Sekian.

Wabillahi Taufik Walhidayah

Wassalamualaikum Warahmatullahi Wabarakatuh.